

CONCERTS

Savognin: igl Coro Calicantus da Locarno tschiffa igl publicum

Cura tgi unfants veivan igl cant

● **pb.** Ancunaschaintamaintg è igl Chor viril Surses chest onn en onn intermediar, noua tgi el sa paragia per igl onn proxim cun en concert sacral pi grond. Uscheia è chest onn betg igls concerts da Pasca, mabagn sto gio sonda passada en concert communabel cun igl chor d'unfants, igl Coro Calicantus da Locarno.

E spezial è igl concert sto an chel senn, tgi igl Chor viril Surses ò davert la seira cun en bloc introductiv ed alloura surlaschea la tribuna agl chor giast ed agl sies dirigent Mario Fontana (49), cun igls sies ca. 50 unfants tranter 9 e 16 onns. An gronda maioritad mattas. E chest chor d'unfants ò gia nigra fadeia da delectar durant passa en'oura igl auditori cun an tot 24 canzungs. Las ples accumpagnadas agl pianoforte da Simone Crociani. Ed alla fegn digl concert era tot igl publicum surpiglia da chella frestgezza giuvenila cun musica sobra e fegna plagn muvimaint ed an ena exactezza ritmica tgi fascheva surstar. E variaziun era schibagn ainten la derivanza internaziunala dallas canzungs scu er ainten igls lungatgs e la preschentaziun dallas canzungs.

Tot ansemen ò sistem

Tgi ins na so betg simplamaint fundar en chor d'unfants ed alloura preschentar en tal concert, era a tots cler. L'antiera tgossa ò sistem. Ed ena gronda part da chel sistem è igl dirigent, Mario Fontana sez. El ò stibgia la ghitarra classica e clavazign. Sessour er musica da scola e divers seminars per furmazion dalla vusch. Igl 1993 è nia fundo igl chor d'unfants cun igl nom dalla flour tgi flurescha igl anvien agl Tessin, Calicantus.

Ma i sa tracta betg simplamaint dad en chor, mabagn dad ena scola da cant. Ed a chella fon part ca. 150 unfants an quatter gruppas. Egna sa deditgescha alla educaziun ritmica e vocala tampreiva digls unfants. Dus gruppas sa preparan per la lavour da chor ed alla finala è alloura igl chor da concert. Chel tgi è sto a Savognin e vo per igl antier mond anturn cun ca.



Igl chor d'unfants Calicantus da Locarno e conturn ò purschia en concert cun cant dad ena frestgezza impressiunonta.

20 concerts ad onn ed ò er gio ratschet diversas rancunaschientschas naziunalas ed internaziunalas.

Ed igl concert da sonda passada è igl resultat da lavour minuziussa da basa sur onns.

Plascheir scu la pi ota maxima

La lavour tgi Mario Fontana ò fatg cun chels unfants è ordvart seriosa e mintgign da chels unfants posseda en fitg bung fundamaint musical. Chegl tanschess pero betg. Chegl tgi dovra an mintga cass aint igl cant ed ainten la musica ansomma, è igl plascheir tgi sa manifestescha an tantas furmas: cun l'expressiun frestga sen mintga fatscha, cun igls tungs sobers e clers or da mintga gargiatta, cun igls muvimaints spir veta e cun la ferma impressiun dad unitad tgi ins ò survagnia scu auditour. E tgi igl success e las rancunaschientschas promovon igl antier plascheir sa tgapescha da sasez.

Angal cun ena metodica tgi sa basa

segl plascheir sa lascha ansomma furmar ensatge scu igl Coro Calicantus. Unfants on bagn chel bung dung dad amprender tot en po pi spert, pero ò en chor d'unfants adegna igl disavantatg tgi igls commembers davaintan planget carschias e bandungan igl chor. Ins stò piglier siva igls giovens ed antschever adegna puspe da nov.

Musica è veta

Igl motto digl concert da Calicantus da sonda passada è sto «cantare è vita». Ins pudess pero er deir «musica è veta», pertge durant igl antier concert on igls unfants vivia cun la musica. Tgi chegl eran alloura canzungs or da tschentaners passos dalla musica u digls noss deis. Igl unfants on adegna vivia sen tribuna chegl tgi els cantavan. Adegna s'adattond agl cuntign. E laschea veiver las canzungs on igls unfants an diversa furma. Per exaimpel cun igl accumpognamaint dad oters instrumaints dasperas igl clavazign. Per exaimpel cun muvimaints fitg

ritmics, sincrons e fitg variants anfignen oradem la detta. E magari, gist tar las canzungs popularas, cun levas inscenaziuns teatralas. Ea, l'antiera tgossa ò gia blera veta dall'antschatta anfignen la fegn.

Ed er igl davos bandunond la tribuna è chegl betg succedia rumplanont giu da stgela, mabagn levet e cantond. Anfignen tgi igl davos digls unfants veva banduno la sala. Ed er anc siva la part uffiziala ainten sala ò igl maestro, Mario Fontana dalunga pandia anturn la ghitarra. E cun bel cant on els legro anavant la cumpagneia. E chegl cun la madama frestgezza scu dus ouras avant tgi els vevan antschet. E tgi els cantan tot ordafora e pon uscheia dar igl antier anim alla musica ed alla expressiun, glez lainsa anc menziunar, è pero per els cun sasez.

Alla fegn digl concert è igl Chor viril Surses turno puspe sen tribuna per cantar anc dus canzungs ansemen cun igl Coro Calicantus: «La sera» e «Tutta nanna tgu».